

Avdo Hajrić, dipl.inž.geod.

Dana 20.10. 2011. godine poslije duže bolesti, smrt je istrгла iz naše sredine Avdu Hajrića, dipl.inž.geod. Sjećanja na kolegu Avdu Hajrića, dugogodišnjeg radnika Općine Novo Sarajevo bolno je za njegove kolege, suradnike i prijatelje.

Rahmetli Avdo Hajrić rođen je 04.08.1962.godine u Foči. Osnovnu i srednju školu završava u Foči. Nakon toga upisuje Odsjek za geodeziju Građevinskog fakulteta u Sarajevu, na kojem je diplomirao 1988.godine. Po završetku studija zapošljava se u rudnik uglja RMU „Miljevina“. Svoje radno iskustvo na geodetskim poslovima ostvaruje i u preduzeću Šipad Maglić OOUR Građenje Foča, potom u Šumsko-industrijskom kombinatu Maglić u Foči, gdje ostaje do početka agresije na BiH.

Za vrijeme agresije dao je veliki doprinos Armiji BiH, u kojoj je bio od samog početka pa do aprila 1996. godine, kada se zapošljava u JP Geodetski Zavod Bosne i Hercegovine u Sarajevu. Godine 1998. zasniva radni odnos u Općini Novo Sarajevo, gdje je ostao da kraja svog kratkog života.

Pamtimo ga kao iskrenog prijatelja i kolegu, koji je nesebično prenosio svoje bogato stručno znanje i iskustvo mlađim kolegama, a svojom dobrotom i iskrenom ljudskom riječju stekao je veliki broj prijatelja. Njegove stručne sposobnosti, primjeren i savjestan rad dovode ga do pozicije rukovodioca geodetske službe, koju je vrlo uspješno vodio i zalagao se za bolji prosperitet struke.

Čitav njegov život bio je ispunjen radom i obavezama koje je uspješno izvršavao i kao takav ostaće njegov lik u trajnoj uspomeni među njegovim kolegama i suradnicima.

Iza našeg rahmetli kolege Avde ostala je supruga Hasena i kćerke Dinka, Nejra i Amna u vječnom bolu i tuzi za izgubljenim suprugom i ocem.

U ime njegovih kolega i u ime njegove porodice neka mu je veliki rahmet i hvala.

Alma Karamustafić

(u ime kolega iz Službe za imovinsko-pravne i geodetske poslove i katastar nekretnina Općine Novo Sarajevo)